

DOMENIE XII «VIE PAL AN»

Antifone di jentrade cf. Sal 27,8-9

Il Signôr al è une fuarce pal so popul,
pal so consacrât une crete di salvece.
Salve il to popul, Signôr,
benedìs la tô ereditât e indrecile par simpri.

Colete

Danus la gracie, Signôr,
di vê pal to non sant un timôr simpri compagnât dal amôr,
parcè che no tu lassis mai cence la tô guide
chei che tu ju âs inlidrisâts su la fonde dal to amôr.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Jer 20,10-13

Il Signôr al à liberade la vite dal puar des sgrifis dal trist.

Dal libri dal profete Jeremie
Al disè Jeremie: «O ài sintudis lis cjàcaris di tancj di lôr:
«Terôr dulintor!
Denunciait e lu denunciarin!».
Ducj i miei amîs
a spietin che mi inçopedi:
«Salacor si lasse imbroiâ
e cussì o rivarìn a vincilu,
si svindicarìn cuintri di lui!».
Ma il Signôr al è cun me tant che un fuart plen di vigorie,
par chel i miei persecutôrs
a cloparan, e no le varan vinte;
a varan grande vergogne parcè che no ur larà drete:
vergogne eterne, che no si le dismentearà par mai!
Ma tu, Signôr des schiriis,
tu scrutinis cun justizie,
tu viodis i rognons e il cûr.
Jo o gjoldarai dal to svindic cuintri di lôr,
parcè che la mê cause te ài lassade a ti.
Cjantait al Signôr,
laudait il Signôr,
che al à liberade la vite dal puar
des sgrifis dal trist!
Peraule di Diu.

SALM RESPONSORIÂL dal Salm 68

R. Tal to grant boncûr rispuidimi, o Diu.
Par colpe tô mi àn cjamât di ofesis
e la mê muse e je plene di vergogne.
O soi diventât un forest pai miei fradis,
un strani pai fîs di mê mari.
Parcè che la passion pe tô cjase mi à consumât

e lis ofesis di chei che ti svilanin mi son plombadis parsore. **R.**

Ma jo, Signôr, ti fâs la mê preiere;
che al puedi jessi chest, o Diu, un timp di gracie.
Tal to boncûr cence fin scoltimi,
Diu, che tu sês fedêl tal dâ salvece.
Scoltimi, Signôr, parcè che la tô misericordie e je tant dolce;
tal to boncûr cence misure dami une des tôs cjaladis. **R.**

Cjalait, puare int, e indalegraitsi,
e vualtris che o cirîs Idiu,
che il vuestri cûr al cjapi fuarce.
Parcè che la puare int il Signôr al scolte
e i siei presonîrs nol bute di bande.
Che lu laudin i cîi e la tiere,
i mârs e dut ce che al nade dentri. **R.**

SECONDE LETURE Rm 5,12-15

Il don de gracie nol è compagn dal fal.

De letare di san Pauli apuestul ai Romans
Fradis, come che midiant di un om sôl il pecjât al è jentrât tal mont e cul pecjât la muart, cussì ancje la muart e je rivade a ducj i oms, parcè che ducj a àn pecjât. Di fat fintremai a la leç il pecjât al jere tal mont, ma un pecjât nol ven metût in cont se no je la leç. Epûr la muart e à fat di parone espotiche, di Adam fin a Mosè, ancje sun chei che no vevin pecjât, par chê lôr colegance cu la trasgression di Adam, che al è figure di chel che al veve di vignî.
Ma il don de gracie nol è compagn dal fal. Di fat se pal fal di un sôl a son muarts in tancj, cetant miei il boncûr di Diu e il regâl dal boncûr di un om sôl, Jesù Crist, si è stranfât sui tancj.
Peraule di Diu.

CJANT AL VANZELI cf. Zn 15,26.27

R. Aleluia, aleluia.

Il Spirt di veretât lui mi fasarà di testimoni,
al dîs il Signôr,
e ancje vualtris o podarês fâmi di testimonis.

R. Aleluia.

VANZELI Mt 10,26-33

No stait a spaventâsi par chei che a puedin copâ il cuarp.

Dal vanzeli seont Matieu

In chê volte, Jesù al disè ai siei dissepui: «No vês di vê pôre dai oms. Nol è nuie di taponât che nol vedi di jessi palesât e di platât che nol vedi di jessi savût. Ce che us dîs a vualtris tal scûr, disêtlu inte lûs; ce che o sintîs inte orele, predicjaitlu sui cuvierts. No stait a spaventâsi par chei che a puedin copâ il cuarp, ma che no rivin a copâ l'anime. Vêt pôre pluitost di chel che al à il podê di fâ finî te Gheene tant l'anime che il cuarp. Dôs passaris no si vendino forsît par une palanche? Poben, nancje une di lôr no colarà cence che il Pari vuestri lu vueli.

Parfin i cjavei dal vuestri cjâf a son stâts contâts ducj. No stait a vê pôre, duncje: vualtris o valês ben plui di une vore di passaris!

Pa la cuâl, se un mi ricognossarà denant dai oms, ancje jo lu ricognossarai denant dal Pari gno che al è tai cîi. Se invezit mi rinearà denant dai oms, ancje jo lu rinearai denant dal Pari gno che al è tai cîi.

Peraule dal Signôr.

Su lis ufiertis

Acete, Signôr, il sacrifici di pacificazion e di laude
e fâs che, purificâts di cheste nestre azion,
o podìn ufrîti un cûr ben disponût e che ti plasi.
Par Crist nestri Signôr.

Antifone a la comunion Sal 144,15

I vôi di ducj viers di te si voltin e a spietin,
e tu tu ur dâs di mangjâ su l'ore juste.

O ben: Zn 10,11.15

Al dîs il Signôr: Jo o soi il bon pastôr
e o rimet la mê vite pes pioris.

Daspò de comunion

Diu, che tu nus âs fats tornâ gnûfs
cul Cuarp sant e cul Sanc prezios di to Fi,
danus pal to boncûr di cjatâ une redenzie sigure
in ce che o fasìn dispès e cun devozion.
Par Crist nestri Signôr.